

# RŪODDA

Laikraštis žemaitišks Nr. 6. Leidēnīs namuokams

## Žemaitišks internets

XXI omžios – tehnoluo-giju ir interneta omžios. Vo mes, žemaitē, puoseliejam žemaitiškomā ir internetē. Ne vēins, katram rūp žemaitiškomā, esam ēiškuojē informacējēs internetē, katra būto pateikta žemaitēškā. „Ruodas“ redakcēje nusprendē pasižvalgītē pu žemaitēška interneta.

Ir kūn mes raduom? Suvedē i *google* paēiška „puslapis žemaitēškā“ arba „portals žemaitēškā“ rōndam daugībē poslapiu, kor aprašuomē īvīkē vēinēp a kētēp susējē so Žemaitējē, bet vēskas īr pateikama ne žemaitiu vo lietuviu kalbo. Širdi gluosta vēina išjīmtēs: *facebook* grupē „Kalbiek žemaitēškā“.

Anuos popoliaroma fenomeno aptarsem atskēro straispniō.

*Facebook* socialēnemē tīnklē žemaitiu rašītēnē kalba īr nauduojama tonkiausē. Žemaitiu kultūras

draugējēs paskēra, katra tor 2000 sekieju, skelb informacējē tik žemaitēškā. Paskīruo, be rimtuos informacējēs, katra informou api draugējēs veikla, žemaitēškoma skatēnēmou svarbius īvīkius, gal rastē ir ne vēina anēkduota žemaitiu kalba.

Stebont ivairēs grupēs ivairiuosiuom tematikuom, katruos reiškās Žemaitējēs miestu gīventuojē, atraduom gerū tendēnciju. Vēs daugiau žmuoniū komentarus raša žemaitēškā.

Labiausē rēkto pagērtē skoudiškius, katrēi komentou beveik vēsumet žemaitēškā. Šērdēs džiaugas, kad žemaitēškā komentou jaunē žmuonis ir ne tiktā diskutoujont žemaitēškoma tematika, bet ir buitiniem temuom, tokiuom kāp keļiū valīms nu snēiga. Gal mestē akmini i telšiškiu darža, tēn žemaitēška rašīma kor kas mažiau, negu

skoudiškiu. Rēkto pažīmiētē, kad retā kas raša tik žemaitiu abēcelē, bet rašont ir lotīnēškuoms raidiemis, puoslinkis i gera aiškē matītē.

Gaila, bet su *Facebook* vēsas linksmas naujīnas vērtoualemē žemaitēškomē ir baigas. Vēsamē internetē raduom šešis poslapius žemaitēškā arba turintius žemaitēška versējē.

Tragēškiausē padietēs īr valdēškūs poslapiūs. Ni vēnuos Žemaitijuo esontiuos savivaldībēs oficialos poslapis netor žemaitēškas versējēs. Bet beveik vēsas tor anglēškas versējēs. Ir savivaldībiu Turizma informacējēs cēntrū poslapē vēsa informacējē teik tik lietovēškā, anglēškā, rosēškā, bet ne žemaitēškā, nors būtēt žemaitēškomā autētēškomā galiēto būtē vēino traukuos motīvo.

Nukelts i 2 psl.

## Žēnīns žemaitēšks internetē

Internets padērba svieta mažesnio. Prietelē gal lēngvīau rastē ruoda, nes atsirada vēsuokiausiu tehnoluo-gēju, katruos palēngvēn komunēkacējē. Eš tuo raduos ē daugībē naujū pruojektu. Vēins eš anū Vikipedējē, katramē gal kortē internetēnē encikluopedējē. Pagrindēnē idiejē bova, ta ka informacējē gali skaitītē sava kalbo. Žemaitē tuo vēituo nasnaudē ē tāp pat sokūrē Vikipedējē žemaitēška, katras pasēikams adreso <http://bat-smg.wikipedia.org>. Kalbamuos so idiejēs autuoriom **Udovīčiom Arno**.

- *Kāp kēla tuokē idiejē?*

- Munēi vēsumet rūpiejē žemaičiu kalbuos rēkalā, matiau anuos siaura nauduojēma vēin tik boitie, ta pats būdams informatēko nusprēndīau prisidietē sklaida Internetē. 2005 metās užtēkau Vikipedējēs pruojekta ē pamēslējau, ka če vēsā gera vēita paruođitē jaunīms žemaitēms, ka mūsa kalba dā nie mēros ē ka ana poikē tink pateiktē vēsuokiausē informacējē. Galū galē jaunēms nažēna, ka žemaitēškā gal rašītē ē če bova vēins eš būdu ton paruođitē.

- *So kuokēs vargās sōsīdūriet nuoriedami īgīvēndintē šēta pruojekta?*

- Pērmiausē ta vēsas biurokratēnēs pruoceđūras. Žemaičiu kalba natoriejē ISO 639 kuoda, katras pažīm kalba. Tou čieso Vikipedējēs sokūrēms bova lēngvīesnis, ta leida sokortē so ruodbalsiu (lt. raidžiū) jungēnio „bat-smg“, kas znuočie „baltu kalba“ + „Samogitia“ (luotīnēšks Žemaitējēs




## VIKIPEDĖJĖ

Liousuojē encikluopedējē

pavadēnēms). Vieliau bova sokorts „sgs“, katras īr patvērtints oficelē, bet Vikipedējē tāp ē lēka so „bat-smg“. Būktās vieliau rēks padērbtē nukreipēma.

Ontros sunkoms bova ta „bēndrēnē“ rašība. Vikipedējuo sotariem, ka rašība rēmsas Girdenē ē Pabriežas rašība, bet ana tor dēdeli mēnosa, ka kuožna tarmie raša palē savēm. Tāp bēndra darba napadērbsi. Tuo vēituo mes padariem šiuoki tuoki bēndrēnēma, bet ons nie tuobols, ta nuognē laukam gramatēkas Pabriežas. Pri bēndrēnēma daug prisidiejē latgalis

Nukelts i 2 psl.



Atsivuožītē – ēšdrīstē;  
brīlios – skrēbelie;  
borkuons – muorka;  
cūgēnis – tinkōs i puora (pvz., arklīs);  
čētkā – daržuoviu smolkēntovs;  
čieps – skēips;  
dēcēns – peilis kiaulē skerstē;  
gūtē – dekis šēinou arba žuolē neštē;  
inēktē – iprastē;  
kiaurīnē – skīlie.

## Žuodīns

## Žemaitėškis internetis

Atkelts iš 1 psl.

Skouda turizmos prista tuoms svetainie žemaitėško pavadėnėmo: skouds.lt, bet vėsa informacėjė pateikama tik bėndrėnė kalbo, je neskaititė tėn idioma lietuviu-žemaitiu kalbuos žuodina.

Smarkė nuvėl, kad žemaitėšku internetiniu poslapiu versiju nier Skouda vėišuosės bibliotekas, Žemaitėjės nacionalėnemė ir Varniu regijuonėnemė parkūs, kėtuos valdėškuos istaiguos, kor ne paskutinius puostus užjem žmuonis atsidevė Žemaitėjė, katruoms tėkrā nereikietom ēiškuotė vertiejė paslaugū, nes patis poikiausė išmana žemaitėška rašta. Gali sakitė, kad ir valdėšku istaigu tinklapiu kūrėma taisiklės, bet juk tėn niekor nier parašita, kad draudama turietė žemaitėškas versėjės. Vėskas atsirem tik i patiū istaigu ir anū vaduovu muotivacėjė.

Apgaiitėnā atruoda Žemaitiu muziejaus „Alka“ poslapis. Žmuonis, katrims valstībė atligėnėma muok už žemaitėškoma puoseliejėma, neužmėršt pasirūpėntė, kad anglėškā šneko lunkituojė rasto vėsa informacėjė, vu žemaitė sava gĩmto kalbo nieka negal paskaititė.

Kėik geresnė, bet vėstėik ne kuokė padietės ir su vėišuosiom istaiguom ir organizacijuom, katruos deklarou žemaitėškoma puoseliejėma.

ŽKD.lt – Žemaitiu kultūras poslapis, kor daugiausė informacėjės žemaitiu kalbo, bet informacėjės ir nedaug, poslapiu dizains pasenės. Bet liginont su „Alkas“ poslapiu, ta jau ir prugresos.

Žemaitijospaveldas.eu – tor žemaitėška versėjė, bet naujause informacėjė tik lėtovėška ir atruoda, kad žemaitėškuo versiju jau senuokā nieka naujė nebededama.

samogitia.mch.miimii.lt – žurnala „Žemaičių žemė“ portals – lėtovėška ir anglėška versėjė, žemaitėškas – nerasta.

Zemaiciupartija.lt – vėskas tik lėtovėškā. Partėjės pirmininks pažadieję, kad artėmiausio laiko atsėras ag versėjė ir ana būs pagrindėnė poslapiu.

Zemaitiualka.lt – Palunguos žemaitiu poslapis.

Daug informacėjės api kultūra ir istuorėjė. Vėina informacėjė lėtovėškā, kėta žemaitėškā.

Samogitianmc.lt – skombio žemaitėško pavadėnėmo poslapis. Apart žemaitiu vieliavas ir pavadėnėma, tėn daugiau nieka žemaitėška nier.

Regijuonėnė žėniasklaida nemata juokė reikala turietė žemaitėškas versėjės internetė.

Vėinintelis švėisuos spindulīs – Kretinguos laikraštis „Pajūrio naujienos“, tor skilti „Būkėm žemaitė“, kor paskutinis irāšos datuojems rugsiejė mienesio.

Rėkto mestė dideli akmini ir i sava darža. Nuors „ruoda.lt“ nikumet nespauzdins ir nedies informacėjės kėtuom kalbuom vu tik žemaitėškā, bet informacėjės kiekis netėnkėn ni mūsa skaitituoju, ni mūsa patiū. Tėkamies ka užsiauginsem rauminis ir ruoda.lt pakelsem i vėsėškā kėtuoki līgi.

Vėsėška tragedėjė so komercėnės poslapės. Mums pavika rastė tik du poslapius su žemaitėška poslapė versėjė. Ventspils.lt – žemaitėška versėjė ne pagrėndėnė, bet kas nuor rastė informacėjės api nakvinė Vėntspilie, gal tūn parskaititė žemaitėškā. Ontros – hus.lt

Straipsnė pabaigā – kelė pruojektā, katrėi nuteik optimistėškā. Dieka Skouda bibliotėkas, atsirada naus pruojects – zemaitiualka.lt, katras sistemins vėskūn kas būs korama žemaitiu kalbo. Tėn rasem žemaitiu kalbuos pamuokū ir edukaciniu žaidėmu. Rėk tikietėis, kad poslapis būs iduomos ne tik siauram kultūrininku ratou, bet ir platesnė visuomenė.

Mes torem žemaitėška Vikipedėjė, katruo jau vėrš 14000 straipsniu žemaitėškā. Kol kas ta neabejuotėnā sėkmingiausis žemaitėška rašta pruojects vėrtoaliuo erdvie ir anam skėram atskėra straipsni šiamė numerie.



## Žėnins žemaitėškis internetė

Atkelts iš 1 psl.

Kocins Armands, nes ons tor patirtėis so latgaliu kalbuos bėndrėnėmo ē tor filoluoga specėlibė. Anėi dronsesni, nes anū mažiau ē labiau jaut ēšninkėma, ta ē daugiau padėrba.

**– Kėik žmuoniū prisidiejė koront pruojekta ē kėik anū ēšlėka lėg šėta čiesā?**

– Palėdos pruojekta rėkiejė prieteliu, kas rašitom. Bova vėsuokiū laikū. Kartās pruojects toriejė ē vėrš dešimt žmuoniū, katrėi raša, vu kartās apmėrst. Čė savanuorėšks pruojects, ta raša vėsi kas nuor. Ir keli adminėstratuorė, katrėi keravuo patė tvarka. Vėins ēš admėnėstratuoriu Šarūns, slapivardžio Hugo.org, savėm laika truopnio žemaičio nuors kėlės ēš Kedainiu ē teka muokintėis žemaitėškā. Kėts truopnos admėnėstratuorios Tuoms Plečkaitis ēš Klaipiedas. Kėts prietelis Botnuorios Aurelėjos (Sharkeen/Jokela) dėdlė prisidiejė pri žuodina deliuojėma. Ir daugibė prieteliu, katrus nuoriečiuo pamėnavuotė. Vėini atėn, kėti ēšėn. Dabā aktīvi ir kuokėi 3–4, nuors automatėnė statėstėka ruoda 23 (šindėin).

**– Kėik čiesā prīreikė, ka idiejė vėrstom kūno ēr atsirastom pėrms straipsnis?**

– Kāp jau mėnavuojau, ta prašima padaviau 2005 metās, jė tėksliau, ta bėrželė 5 dėina. Vika intensivos sosirašėniejėms ē 2006 metu kuova 25 dėina pruojects bova paleists. Nuoront paleistė pruojekta jau toriejė būtė sokortė keli straipsnė inkubatorie, ta pėrmāsīs torietom būtė kažkor tamė tarpė.

Galo pasidėdžioutė, ka dabā toram par 14400 straipsniu ē so tou skaitliom esam 114 vėituo ēš vėsū vikipedėju.

**– Kuokiū tėkslū sėikiet igivėndintė šėtou pruojekto a tus tėkslus pavika igivėndintė?**


– Čė būktās toriečiuo šnekietė aple sava tėkslus. Pėrmiausė ta pats nuoriejau žemaitėms paruoditė, ka žemaitėškā gal rašitė. Tas pavika. Dėdlė daug gavau atsilėpėmu. Žėnuomās ēšlinda ila ēš maiša, ka bėndros darbs rėkalaun vėinuodėnėma, ta čė tuoks ontros tėkslos, katras at-

sirada vieliau ē dabā daugiausė dėrbo pri tuo (na vėin Vikipedėjuo). Šėta tėksla naėšėjė dā pasėiktė.

**– Kuokė tematėka viraun vikipedėjuo žemaitėškuo?**

– Kas kam patink. Lėngviausė „keptė“ straipsnius aple givėnvėitės Lietovuo, nes tūn darba gal ē buotā (automatėnės prougramas) dėrbtė, bet ir ē pėlnū straipsniu so iduomės faktās. Viraun geografėjė, biologėjė.

**– A gal straipsnius rašitė vėsi nuorontis a rėk atitėktė kažkuokius rėkalavėmus?**



– Čė pagrindėnė esmie ēr i, ka gal rašitė kuožnos nuorons. Žėnuomās, ir rėkalavėms – rašitė žemaitėškā. Dā paprasčiausės etėkas nuormas ē teisībė. Jė teisībės ir kelės (pvz., istuorėjės interpretacėjės), ta rėktom pateiktė kelis.

Šėp polėtėka torietom būtė šuonė, bet vėina detalė lėikt – žemaitė tor sava kalba, na tarmė, nes kėtāp nabūtom prasmies torietė tuoki pruojekta. Mon asmenėškā, ta nabūtom prasmies ē rašitė žemaitėškā.

**– Kuoks lonkuomoms par mienesi, metus?**

– Mūsa vikipedėjė grėtā būs 10 metu. Sosiduomiejėms būn bonguom. Būktās kas paraša kuoki straipsni laikraštie a paruoda par televėzėjė, ta tas sosiduomiejėms padėdie, paskiau vielėk atslūgst. Dabā natoro statėstėkas kuoks tas lonkomoms, bet ons nie dėdelis. Straipsniu atsirond 2-4 par mienesi. Dabā tas atslūgėma perėjuods, vieliau būs vielėk kuoks bums. Gė tēi tūkstontė straipsniu atsirada kažkāp.

**– Vėino meto vika aktīvės diskosėjės diel žemaitėš-**

**kas vikipedėjės uždarīma. Kam labiausė kliodė, ka žemaitė tor sava virtualė enciklopedėjė ē kāp vėsa ta istuorėjė pasibėngė?**

– Noij, bova tuoks moments, kumet tarpė lietuviu atsirada tuokiū, katrėi panuora vikipedėjė žemaitėška uždaritė. Bet sosizgrėba vielā, jau toriejom par 10000 straipsniu, ta kėtatautė paveiziejė keistā i tus nuorus. Žėnuomās sunkiausė bova užginčitė argumenta, ka žemaitė nator kalbuos, bet padiejė tas, ka žemaitė jau bova gavėn ISO

kuoda sava kalbā. Pagaliau paprasčiausis teksta paligėnėms ruoda skėrtomus. Bova tarp nuorončiu uždaritė ē žemaičiu. Bet kėik spiejuom so tuokės sotartė, ta jė jau žemaitėškā naraša, ta bėnt jau tanatrokda.

**– Kuokė isivaizdounat vikipedėjė žemaitėška pu 10 metu?**

– Pėrmiausė ta torietom būtė sotvarkīta ta natvarka diel bėndrėnės rašības. Tas labiausė trokda skaititė. Būktās par dešimt metu žemaitė labiau žėnuos kāp rėk rašitė, ta ē tuos dronsuos atsėras. Tėkous tuokiū straipsniu, katrus galies skaititė tik žemaitėškā, nes kėtuom kalbuom nabūs arba torietė daug ēšsamiū straipsniu, ka žmuonis jungtomėis ēiškuotė infuormacėjės, katra anīms būs naudinga.

**– Kon dā galat pridortė?**

– Nuoro padėkavuotė vėsimis rašontīms vikipedėjuo žemaitėškā, kvėito prisidietė naujīms. Dā nuoro pasidžiaugtė ē pasveikintė vėsus šindėin (2016 01 16) so Vikipedėjės pruojekta 15-oujo gimtadėinio!

**– Diekou už ruoda.**

## Istuorenė faktā

1329 m. kryžiuokā, vadovaujamė Čekėjės karaliaus Juona Liuksenburgietė, apgolė Medviegalė pili, katruo bova api 6000 žmuoniū. Žemaitė gīnies, bet bova priverstė pasidoutė.

Vīrus, muotrėškas ir vākus pakrėkštėjė, bet pu kėik laika anėi viel grīža pri sava senuojė tikiejėma.

Pilienu pėlėis tragedėjė geruokā palaužė Žemaitėjės jiegas ir pasipriešėnėma Ordėnou. Pu 1336 m. žemaitė bova priverstė atsisakītė karū su Ordino.

1382 m. spalė 31 d. Dubīsas žiuočiu saluo Jogailas ir Skirsgailas vardo bova pasirašitas trīs sutartis su Ordėnou. Pagal vėina sutarti Lėtuvuos kunigaikštė pasizadiejė apsikrikštītė, pagal

ontra – padietė Ordėnou kovuotė priš anū priėšus. Pagal tretiojė sutarti – Ordėnou bova atidoutas žemaitiu žemės tarp abijū Ordina daliū iki Dubīsas, bet Jogaila, matīt, jau 1383 metās žėnuojė api ketėnėma kvėistė anū būtė Lėnkėjės karalio ir api žanatvė su Jadvīga.

Jogailas politika igava savaronkėška kripti. Križiuokā nutraukė sutarti su Jogaila ir pradiejė tartėis so Vītauto. Anūn apkrėkštėjė ir pradiejė kaulītė, kad atidoutom Žemaitėjė.

1383 m. Žemaitius Ordėnou bova užrašės Jogaila, vu 1384, 1392, 1400 ir 1409 m. – Vītauts.

1398 m. spalio 12 d. Vītauts Dėdėsis Nemuna

saluo sudarė sutarti su Križiuoku Ordėnou (Salīna taika), pagal katro LDK Ordėnou užrašė Žemaitius iki Neviežė opės. Lik tuo laika žėnuomė žemaitiu padovėnuojėma Ordėnou bova tik pažadā, ta šė sutartis ir Vītauta pažads padietė užvaldītė žemaitius, križiuokams kielė pagrīstas viltis. Bet žemaitius Ordins tevaldė tik iki 1401 m., kol Vītauts Vilniaus ir Radoma Aktās formalė igava LDK tėtola. Tas patės metās sukėlė žemaitė sonaikėna dvė pilis, katras Ordins bova pasistatės Žemaitijuo, tad pu tuo Ordins Žemaitijuo nebtor kor beisitvirtintė ir belėka sugrīž-



tė pri iprastū kariniu žīgiu. Ordėns apkaltėna Vītauta, kad uns sukorstė žemaitius sokėlėmou.

1410 m. ivīka Žalgėrė mūšis, pu katruo baigies Žemaitiu karā su križiuokās.

1411 m. vasarė 1 d. Vīslas Saluo prišās Torūnė Lėtuvuos ir Lėnkėjės valstībės pasirašė sotarti su Vokietiu Ordėnou, pagal katrūn Vītautou ir Jogailā iki gīvuos galvuos atiteka Žemaitiu žemė.

1411 m. Žemaitiu seniūno Vītauts paskirė Kesgaila Valimantāti.

1411–1795 m. – Žemaitėjė bova seniūnėje. Ta ir teritorinis – administracinis vėinets, katras iki pat Neviežė apjiemė vakarėnė Lietova. Anou sodarė žemės, vo vėliau valstė. XVI omžiaus pėrmuo pusie veikė 29 valstė, katrėi vėliau

beveik nesikeitė. Be anū i Žemaitėjės Seniūnėjė dar ijejė Jurbarka apilėnkė ir Dėdiojė konigaikštė Skirsnemonės dvars (Užnemonės apilėnkės, katruos priklausė Vilkijuos ir Veliuonas valsčiams ir Skėrsnemonės ir Jorbarka dvars).

Nu XV omžiaus pėnkta dešimtmetė pradiuos Žemaitiu seniūnėje dar bova vadėnama ir Žemaitiu konėgaikštystė. Anuos konėgaikštė tėtulavuos Lėtuvuos Dėdėsės konėgaikštės.

1413 m. Vītauts ir Jogaila, savaitė nuvīkė i Žemaitėjė, sėmbuolėškā anon krėkštėjė, tūn darīdamė tikiejuos susilpnėntė Ordėna prėtėnzėjės i Žemaitiu žemė.

1413 m. Vītauts, pėrmasis iš Lėtuvuos valduovu, Žemaitems suteikė privilegėjė (dokumėnta teksts nier išlėkės).



## Anekduotā

Ein žmuogos iš oušvienės pagraba nomėi. Vėrš galvuos praliekdams paukštis turkšteliėjė unt galvuos. Žmuogos paveiziejė i dongo i saka: „Oušvien, a to jau tèn?“

\*\*\*

Papoulė narkomans i pekla. Vākščiuo, vakščiuo... Veiz – vėsos lauks kanapiu! Uns tik skaba tik skaba, tojau prisistatė vels i saka: „kam to skabā, paveiziek kėik malku jau yr prikriauta“. Narkomans paveiz – tėkrā! Uns ka pradies soktė soktėnės, tik sok, tik sok. Vels i saka: a to nematā kėik ir prisokta? Narkomans veiz – stebuklos! I šauk velniuou: douk degtuku!!! – Tėp tėp, je būto degtoku būto ruojos...

\*\*\*

Stuov nusimėnės gruzins. Priein kėts gruzins i klaus: – Kuo tuoks nelaimings?

– Vakar torgou tokėi vyrā ožpoulė ir uždraudė prekiautė ouguom. Vo kas neklausė tam ougas i sobėnė sokėša.

– Vo to irgi nepaklausė? – Iš kor aš galiejau žėnuotė, ka arbūzā irgi ougas.

\*\*\*

Petrioks parejės nomėi saka tievou:

– Aš šėndėin pas tavi bovau darbė.

– Vu kuo tau tèn prireikė?

– Pingu, bet tavės neradės išsitraukiau iš tava kėlniu kišenės 100 euru. Nepiksti?


– Ne, Petriok, matā jau savaitė aš tèn nebdėrbo. To kėta karta nors i tūkstontė pasijimk.

\*\*\*

Atėn pu pamuokū nomėi aštuntuokė i pasakuo mamā:

– To žėnā, šėndėin

### EVAKUACIJUOS PLANS



muokikluo bova ginekologė, vėsas nurėnginiejė i tīrė. Pasiruoda, ka mūsa klasie tik vėina mergātė.

– Tėkous, kad to.  
– Ne, mama, mūsa auklėtuojė.

\*\*\*

Šeimuo ginčos. Vīrs:  
– To senesnė už muni! I numirsi onkstiau!

Žmuona išsitrauk šautovā:  
– ...Nejaugi?

\*\*\*

Vīrėšks atėin i darba va-

londa pavėlavėš, vėsos su bintouts. Viršininks:

– Dėl kuo pavielavā?  
– Iškrėtau iš penkta aukšta.  
– No kūn, ciela valonda krėtā?

\*\*\*

Lėktovs patyrė katastrofa ir nukrėta i negīvenama sala. Vėnintelis lėkės gīvs sied pu palmė, gluostīdams kaula. Gelbietojė, pamatė malka žmuoniū kaulu anam už nogaras, parsigonda.

– Aš sopronto ka jūs monės nekėntat už tūn, kū padariau, bet juk mon reikiejė kovuotė už sava gīvenėma. Mon vėnam reikiejė išgyventė negīvenamuo saluo.

Gelbietuojū vads:  
– Aš, aiško, sopronto, ka dėl gīvībės žmuogos gal vėskūn, bet juk lėktovs nukrėta tik vakar!!!

\*\*\*

Gatvė vākščiuo mitri ba-

būnelė. Abijuos rūnkuos pu tašė – vėina dėdelė, kėta maža. Iš dėdiuosės kas dešimt žingsniu iškrymt pu 5 eurus. Policininks priein ir saka:

– Tamstā iš tašės piningā laksta.

Babunelė atsisukusi:  
– O , tėkslė, rėk grīžtė so-sirinktė.

Bet policininks klaus:  
– Vo iš kor tėi piningā? Gal pavogė?

Babūnelė:  
– Ne, aš gīveno šalėp stadijuona i ka par varžības kas nuors iš sėrgaliu lek pri mūsa *padjeizda* nusimižtė. Aš už krūmu jau stuovo su žirkliem i sakau: arba 5 eurai arba nukėrpso!

Policininks saka:  
– Nebluogs biznis, vo kas untruo tašie?

Babūnelė:  
– No... juk ne vėsė užsi-muok.

# Žemaitiu kultūras draugējēs puosiedēs

Lapkrētē pabaiguo ivīka ŽKD prezidioma puosiedis. Sosirinka atstuvōvā iš vēsuos žemaitējēs, trūka tik skuodiškiu, katrīms puosiedis supuolē so rēngēnēs Skoudē.

Puosiedis prasidiejē nu naujū ŽKD īstatu svarstīma. Praejēs ŽKD sovažia-vēms igaliuojē prezidioma parouštē naujus īstatus, katrus turies tvirtintē atei-nuntis suvažia-vēms. Klau-sēma pristatē prezidioma narys Vaivada Vacīs. Pra-diuo īstatu svarstīms vīka sklon-dē ir nobuodē.

Aistras pradiejē kēltē, ka kēts prezidioma narys, Žebrauskis Algērds, pasi-ūlē neapsirēbuotē vēinu formulavēmo api kultūras saugojēma i puoseliejēma, vo papēldomā itrauktē api žemaitēška identiteta puoseliejēma. Nuors daugoma salēs palaikē Žebrauskē siū-lyma, Vaivada vēsēp stin-gies tuo siūlīma nepastebietē, kol šēp tēp baigē īstatu

pristatīma. Īstatu klausēms kol kas lēikt atvērs.

Jau miniets Žebrauskis Algērds papasakuojē api paminkla Dorbēs mūšiuo pastatīma reikalus. Nema-žā darbū jau ir bēngtē ir pats paminklos jau ir le-jems. Darbū pabaigēmuo dar trūkst api 35000 euru. Dēl tuo bova prašuoma vēsū pagelbas ēiškont rē-mieju. Vēsē, paaukuojē bet 675 eur, bus iomžintē unt paminkla irāšont aukuoju-siu pavardē, varda arba or-ganizacējēs pavadēnēma.

Paminklos planuojems atidēgtē Pasaulē Žemaitiu dēinū meto, karto būto pērma karta sogēidams Že-maitējēs himns.

Varniū skīrius pirmi-ninks Šedvēls Linis pa-paskuojē api Žemaitējēs himna kūrēma. Nuors pra-dē bova ne kuoki, bet šēn-dēin jau ir atsiūsta 16 him-na žuodiu varijantu. Atrin-kos žuodius bus skelbams konkursos mozēkā sokortē.



Varniū skīrius pirmininks Šedvēls Linis posēdio metu.

Žalpīs Edmonds pateikē nemažā informacējēs api būsēmas Pasaulio Žemaitiu dēinas. Bova pristatītē Že-maitiu dēinū ambasadorē iš kėkvēina Žemaitējēs rajuona ženuoma žmuo-go, katras iš tēn kēlēs, bet gīven Vėlniuo. Pasiroušēms rēgēniu vīks gana sklon-dē. Sotarti dēl dalīvavēma Pasaulē Žemaitiu rēnginiūs pasirašē 16 Žemaitējēs sa-vivaldībiu. Be kultūrinu ir istuoriniu rēnginiū numa-tuoma ir sportēnē pruo-

grama. Tuoks renginīs bus pērma karta, dēl tuo vēsē det pastongas, ka pērms blīns neprisvėlto.

ŽKD prezidioma narems bova pristatīts ir „Ruodas“ laikraštis. Laikraštis bova pasidalints paplatēnēmuo skyriūs.

Nu savēs straipsnē pabai-gā galem pridietē – bendros įspūdis iš ŽKD puosie-dē – ne kuoks.

Organizacējē trūkst idieju, absoliuti daugoma nariū ir garbinga omžiaus, vu pati

ŽKD atruoda smarkē stabariejunti, bet api tūn platiau kėtūs „Ruodas“ numeriūs.

Pastaba nu laikraštē vertiejēs Gricienēs Genoveitas: senokā, je dar ir jodon, gal nemažā noveiktē. Nieks netrokda jaunīms žmuonīms atētē pri žemaitēškas veikluos. Je tik jaunū bus užtektēnā – mes pasitrauksēm. Organizoukities, dērbkēt, dalīvaukēt. Juk vēitas pu Žemaitējēs dongo užteks visīms. Vu senatvė atēs neišvėngamā...

Pardoudams naujuos statības 3 kombariū, 72 kv. m. buts Latviju, pajūrē miestālī ROJA. Autonuominis šildīms elektra. Pardoudams ĩrengts su visās baldās, tudie juoki galvuos skausma diel buta remuonta i statībininku. Bute buva vīkduoms nuomas verslas. Per metus buts uždērba api 5000 eur iš nomuos. Tas sudara api 13% metiniu palūkanu, kap tum tarpu bankā muok už indielius max 1%. Nams rundās pušīni, 800 m lig jūras. Butū priklausa 2 parkavēma vēitas. Idealus variants ontram šeimuos būstū arba ēiškontēims patraukliuos investēcēnēs gražuos. Esont susidomiejimou pakonsultousu visās klausimās susijusēs su nuomas verslu Latviju. Palonguo analuogēšks buts minimum dvigubā brungesnis.

Roja – ramus kuruortinis miestālīs su visa reikalinga infrastruktūra: krautuvim, kaviniem, vakū žaidēma aikšteliem. Atstums iki Vilniaus 400 km, iki Kauna – 350 km.




**Žemaitė, žemaitėfėkukės!**

**Žemaitėjės vieliava - 30 eur.**  
**Akcėjė! Žemaitėjės vieliava + stėibs (6 m aukštė) - 80 eur.**

**Tel. 8 684 59213**

**Če gal būtė Tamstas reklama!**

Reklamas kaina: pėrmam poslapie: 1 eur/cm<sup>2</sup>,  
 paskotėniam poslapie 0.4 eur/cm<sup>2</sup>,  
 vėdėniūs poslapiūs 0.3 eur/cm<sup>2</sup>,  
 skelbema kaina 2 eur.

**Tel. 8 684 59213**